



KEMENTERIAN PERPADUAN NEGARA

SIARAN MEDIA

YAYASAN TUN RAZAK TERIMA PERUNTUKKAN RM 100 RIBU BAGI PELAKSANAAN PROGRAM KEPIMPINAN BELIA

KUALA LUMPUR, 26 Januari – Yayasan Tun Razak menerima peruntukan sebanyak **RM100 ribu** bagi pelaksanaan program-program kepimpinan belia berimpak tinggi. Perkara tersebut diumumkan oleh YB Datuk Aaron Ago Dagang, Menteri Perpaduan Negara semasa menyempurnakan **Program Kepimpinan Yayasan Tun Razak 2026 (TRF LEAP)**.

Peruntukan tersebut disalurkan sebagai **usaha membangunkan pemimpin-pemimpin muda dalam kalangan belia** menerusi penganjuran program-program kepimpinan di samping mengambil inspirasi daripada perjuangan dan nilai serta sumbangan Tun Abdul Razak. Pada masa yang sama, peluang untuk menimba ilmu dan membina jaringan profesional juga boleh dimanfaatkan sepenuhnya oleh peserta di samping dapat memainkan **peranan sebagai ejen perubahan sosial dalam usaha memperkukuh perpaduan dan keharmonian negara**.

YB Datuk Aaron Ago Dagang, dalam ucapannya turut berharap agar **Arkib Negara Malaysia dengan kerjasama Yayasan Tun Razak dapat menghidupkan semula Memorial Tun Razak melalui aktiviti dan pameran yang interaktif serta menarik**. Pendekatan baharu ini perlu dikaji dan dilaksanakan dengan melibatkan semua pihak terutamanya anak muda dan pelajar sekolah agar lebih relevan dengan generasi hari ini.

Bermula tahun ini, Yayasan Tun Razak juga akan melaksanakan **inisiatif baharu dengan pendekatan yang berbeza dan lebih segar** berbanding tahun-tahun sebelum ini melalui **empat program utama**

yang akan dilaksanakan seperti penghasilan **Dokumentari "Tun Razak, The Requiem"**, penerbitan buku **Leadership the Razak Way**, kerjasama dengan **Muzium Pahang** menerusi penerbitan semula karya **"Puisi Mengenang Negarawan Ulung"**, serta acara di **Universiti Oxford** melalui tayangan dokumentari dan sesi panel di **Blavatnik School of Government**.

Penganjuran majlis ini mencerminkan iltizam Kerajaan MADANI untuk menghidupkan semula nilai-nilai kenegaraan, semangat patriotisme dan pengorbanan yang telah ditunjukkan oleh tokoh negarawan ulung yang banyak berjasa dalam membina asas kekuatan negara bangsa Malaysia.

KEMENTERIAN PERPADUAN NEGARA

26 Januari 2026

KPN.100-9/1/16 (3)